

2

ventriculus ex more obruitur. Quid multis? Jamdudum humanæ mentis cæcitatem queruntur Medici; sed frustra. Diem die trudente, atra cura, febres innumeræ, & formidolosa malorum cohors miseros mortales ad mortem usque insequentur. Dura & fatalis quidem necessitas! Ni ad manum haberemus remedia, quibus tot sanitatis & ipsius vitæ insensu hostes feliciter profligari possent. Non malè igitur de civibus meruisse credam, si chronicos morbos breviter perstringere, simul & minerales Aquas Pruvinenses, tanquam dulce solamen & præsens auxilium contra exitiale istud affectionum genus, suppeditare aggrediar.

I I.

INTEGRA sanitas, punctum fugax, quo frui & gaudere rarò homini datur: I adeò fragilibus nititur fundamentis corporis humani compages! Reverà solidis ac fluidis totum constat partibus, quarum æquilibrium sanitatem & vitam equidem constituit. Si autem, ab ordinationibus suis vel leviori momento declives, irregulari nimiove motu corpus exerceant; tunc perturbantur œconomiae animalis leges, omnia sua deque miscentur, & brevi longa exsurgit symptomatum series, quæ à diversâ læsarum partium indole & naturâ originem ducunt. Ne autem in relegendis latentibus causis abstrusiora tentare videamur, ad propositum redire properamus. Morbi igitur chronici illi dicuntur, quibus, non nisi longo tempore elapso, è medio tollitur æger, vel ad pristinam sanitatem restituitur. I Insensissimi, contumaces, omnium locorum, temporum, ætatum, æquo pede pulsant pauperum tabernas, aureaque divitum atria. Incautum semper ludens, sagacem Practici sæpè fugit aciem occulta illorum sedes; quam evolvere & in apricum proferre abstrusum, nec nisi verè Medico datur. Eò gravioribus grassantur symptomatibus, quò magis larvati, mentitâ benignitatis specie ægrum securosque assidentes diutius fallunt. Modò, veluti ignis suppositus cineri doloso, miti extus calore benigni, cæco intus æstu flagrant, tacitè serpunt, sese perfidè dissimulant, & tristissima minantes inducias nectunt: modò debacchati crudeliter sæviunt, vices Protei gerentes, ac specificorum solo alligandi vinculo: quin & vitam morte ipsâ acerbiorē aliquandò reddunt.

I I I.

(a) Tract.
de Podag.
pag. 432.

FONS communis morborumque chronicorum parens, (teste Sydenhamo (a) fideli naturæ interprete) humorum indigestio; quæ quidem innumeras stagnationes diversi generis procreare valet: undè gastricarum functionum damnosa læsio; hepatis, mesenterii, cæterorumque viscerum infarctus, obstructio & miseranda debilitas. Tot & tanta mala à primis viis natales ducere miraris? aspice miseros, qui tali labe afficiuntur: appetitu carent; difficulter ac ne vix quidem concoquunt; eructationibus nidorosis, acoribus, borborygmis, vomitibus obnoxii patent; alvo plus æquo solutâ aut astrictâ laborant; singultus, syncopes patiuntur; spontaneis defatigationibus torpent; sæpè toto corpore rigescunt, vel edaci uruntur igne; qui depauperando humores, colligatos sudores ciet, & brevè flebilem prostrabit ægrum. Sæpè sæpius hæc symptomata vires acquirunt eundo, exasperantur & ad mortem usque ingravescunt. Imperfecta retentorum excernendorumque elaboratio, & segnis eorum secretio inordinatos motus concitant, ac per plures tragædias agunt: languet nempe nutritio, & corpus suâ defraudatum alimoniâ miserè tabescit. Tunc

pallent ora, cavi dedecorantur oculi, exacuantur nares, subsidunt genæ, perpetuis vigiliis quatitur irrequieta mens; nulla functio manet inconcussa. Depravata bilis, quæ data porta ruit, & mox errore viarum, ingratus hospes aut transfuga infensissimus, sanguinis alveo miscetur, & omnem corporis peripheriam atrâ flavedine inficit. Hinc deformis icterus, sitiens hydrops, languida chlorosis, cacochymia & cachexia pedissequi, suum etiam conferent symbolum ad victimam morti nesciæ flecti litandam.

I V.

HASCE calamitates à miseris mortalibus avertere cupis? Principiis obsta, & naturâ duce, morbum in intimis recessibus plerumque latentem curiosius insequere. Nec tibi defunt auxilia, quibus hostis debellari potest: Si verò sapias, immensâ medicamentorum farragine omnino ferè omisâ, ad minérales Aquas Pruvinenſes, tanquàm ad tutissimam salutis anchoram, haud morâ confugies. Reverâ si analysim consulamus, nostras minérales Aquas in morbis chronicis non dubiâ vi pollere, jam luce clariùs patebit. E puteo recentè (a) haustæ, intuitu subpætulæ, aquâ stillatitiâ tantillum graviores, saporem subdulcem, adstringentem & stypticam linguæ imprimunt: in lagenâ succussæ, aut aëri libero expositæ, particulas ferreas sub ocræ formâ dimittunt: undè acido vitriolico & magnâ mobilissimi aëris quantitate illas imprægnari constat. In duabus harumce libris vitrioli martialis quinque, salis vitrioli celsenitosi quinque vel sex, aluminis salisque glauberiani duo aut ad summum tria plerumque hospitantur grana. Talibus autem ex principiis in infinitum penè divisim exsurgit tota frigidarum aquarum chalybeata virtus; quæ quidè aliundè partibus salinis, quibus scatent, ventriculi tonum lenitèr exsuscitare, viscera intimis subire, minutissimos universi corporis canales celeritèr permeare, necessariò valent. Hinc expedita & vegetior circulatio; quicumque viscosus humor dilutus & attenuatus; obstructions viscerumque infarctus reserata: hinc vividiores solidorum oscillationes; perfectior digestio, proindeque uberior succorum laudabilium proventus. Verbo dicam; Aquæ mineralis nostræ optatum æquilibrium reducendo, solida & fluida

(a) Confer. Libel. cui titulus: Analyse des Eaux minérales de Provins, par M. CHAPOIX an. 1770.

V.

NON una eademque medendi ratio in diversis morbis, qui vel tacitè serpunt, vel aperto Marte propugnant. Quicumque igitur illos depellere satagit, remediorum naturam apprimè calleat, necessum est; alioquin à recto tramite & legitimâ curatione defleat: à prudente Medico tantum administrantur, & ipse abſtineat, si methodum nescit. Prælibatis idè generalibus remediis, & idoneâ mediante diætâ, minérales Aquas præscribendo, non nisi cautè procedes. Manè jejuno ventriculo, pluribus vicibus, & intervallo plus minùsve longo inter unumquemque cyathum intercalato, propinandæ sunt. Sed modus in rebus; nec, invitâ Minervâ, quidquam moliri velis: nam ubi ventriculum gravant, digestioni officiant, nedum opitulentur. Si liberaliùs & perperam illis sese proluit æger, res quandòque non prosperè cedunt: sic, humores nimis exagitando, cerebrum scandunt; & tunc inebriant, ventrem movent; tormina, diarrhæam, vomitum, aliosve hujusmodi effectus, diætâ faciliè compescendos, procreant. Ab aquis abſti-

neant illi, quorum fervidus sanguis, aut ardens jecur & inæstuans bilis. Purgantia etiam, inter earum usum, penitus ableganda: nam firmiter retinendum (a) quod quotiescumque morbi curatio remediis corroborantibus innititur, evacuationes, qualescumque eæ fuerint, officiunt. Et certè inconsiderata purgantium applicatio virium magis quàm morbi fontem exhauritur; aquarum mineralium efficaciam infringit, & sanitatem vix restitutam de novo deturbat. Nil tamen ab artis Magistris, naturæ fidelitèr obtemperantibus, reformidandum. Utile consilium dabunt; & in pluribus morbis ad mineralium aquarum, tanquàm ad salutis fontes, dimittent ægros: undè concludere licet.

Ergò Morbis chronicis Aquæ minerales Pruvinenfes.

DOMINI DOCTORES DISPUTATURI.

M. LUDOVICUS - HIERONYMUS RAUSSIN, Doctor - Regens, Antiquior Scholarum Magister, & Professor Antonianus.

M. HENRICUS NINNIN, Doctor - Regens, salubris Consilii Regii Socius; Serenissimi Principis Claromontii Comitis, dum viveret, Med. Ordinarius; necnon Regionum Nosocomiorum Inspector; Professor Scholarum.

M. DESIDERIUS LE CAMUS, Doctor - Regens, Professor Antonianus & Decanus.

M. ROBERTUS FILLION, Doctor - Regens, Professor Mallius.

M. JOANNES - BAPTISTA - PETRUS - HENRICUS CAQUÉ, Doctor - Regens, Professor Scholarum.

M. VALENTINUS - MARIA LAIGNIER, Doctor - Regens, Professor Scholarum.

Proponebat Remis, PAULUS - JOSEPHUS - VICTOR NAUDOT, Pruvinenfis, Senonensis, Saluberrimæ Facultatis Remensis Baccalaureus; Theseos Autor.

A. R. S. H. M. DCC. LXXVII.

PRO LICENTIATU.

Ex Typis JEUNEHOMME, Regis & Facultatis Medicinæ Typographi.